

ՀԱՄԱՁԱՅՆԱԳԻՐ

Հայաստանի Հանրապետության վիճակագրության, պետական
ռեգիստրի և վերլուծության նախարարության և Ռուսաստանի Դաշնության
վիճակագրության պետական կոմիտեի միջև համագործակցության մասին

Հայաստանի Հանրապետության վիճակագրության, պետական ռեգիստրի
և վերլուծության նախարարությունը և Ռուսաստանի Դաշնության
վիճակագրության պետական կոմիտեն՝ այսուհետև՝ "Կողմեր", հիմնվելով
վիճակագրության բնագավառում համագործակցության զարգացման և երկու
պետությունների վիճակագրական մարմինների փոխգործունեության
ակտիվացման փոխադարձ շահագրգռվածության վրա, համաձայնվեցին
ներքոհիշյալի վերաբերյալ.

ՀՈԴՎԱԾ 1

Կողմերը կիրականացնեն համագործակցություն հետևյալ հիմնական
ուղղություններով.

վիճակագրական ցուցանիշների համակարգերի ստեղծման և
գործունեության մեթոդաբանական մշակումների, վիճակագրական
դիտարկումների անցկացման, այդ թվում մարդահամարների, առավել կարևոր
ընտրանքային հետազոտությունների և բնակչության հարցումների ծրագրերի և
մեթոդների փոխանակում.

վիճակագրական տեղեկատվության փոխանակում Կողմերի կողմից
համաձայնեցված թեմաներով.

պետությունների և առանձին տարածաշրջանների սոցիալ-տնտեսական
դրության վերաբերյալ վիճակագրական հրատարակությունների և հրապա-
րակումների, տարեգրքերի, ժողովածուների, տեղեկագրերի, հաղորդագրու-
թյունների և ակնարկների փոխանակում.

հայելային վիճակագրության ներդրում և ըստ "Անկախ Պետությունների
Համագործակցության արտաքին տնտեսական գործունեության ապրանքային
անվանացանկի" չորսանիշ կոդերի ապրանքների և ծառայությունների
արտահանման և ներմուծման վերաբերյալ տեղեկատվության փոխանակում.

ըստ համապատասխան միջպետական համաձայնագրերում նախատես-
ված անվանացանկի և ժամկետների՝ ինվեստիցիոն և սպառողական ապրանք-
ների մատակարարման վերաբերյալ տեղեկատվության հավաքագրման
կազմակերպում և փոխանակում.

վիճակագրության բնագավառում համակարգիչների, տեղական ցանցերի և
ծրագրային մշակումների օգտագործման փորձի փոխանակում, տվյալների
ավտոմատացված բանկերի ստեղծման, նոր տեղեկատվական տեխնոլոգիաների
ներդրման գործում փոխադարձ օգնության ցուցաբերում.

վիճակագրական պրակտիկայում ազգային հաշիվների և միջազգային
նորմերին և ստանդարտներին համապատասխանող այլ հաշվառման և
վիճակագրության համակարգերի ներդրման գործում փորձի փոխանակում և
փոխադարձ օգնության ցուցաբերում, ինչպես նաև համապատասխան ծրագրերի

ու նախագծերի մշակումների ընթացքի և իրականացման վերաբերյալ տեղեկատվության փոխանակում.

գների վիճակագրության, համապատասխան վիճակագրական ցուցանիշների հաշվարկի մեթոդաբանության բնագավառներում փորձի փոխանակում և փոխադարձ օգնության ցուցաբերում; սպառողական ապրանքների և ծառայությունների գների ու սակագների մակարդակի փոփոխման, բնակչության կենսամակարդակի և սոցիալ-տնտեսական զարգացման այլ ցուցանիշների վերաբերյալ տվյալների փոխանակում.

սպառողական, ինվեստիցիոն ապրանքների և ծառայությունների գների, ինչպես նաև համախառն ներքին արդյունքի հիմնական բաղադրամասերի և տարադրամի գնողունակության համարժեքության միջազգային համադրումների իրականացում կանոնավոր հիմունքներով (եռամսյակային և տարեկան).

բնակչության զբաղվածության, գործազրկության վերաբերյալ տվյալների և աշխատանքային ռեսուրսների շուկայի ձևավորման բնագավառում վերլուծական հետազոտությունների փոխանակում.

տնտեսավարող սուբյեկտների սկզբնական և հաշվապահական հաշվառման հարցերի վերաբերյալ փորձի փոխանակում.

փորձի փոխանակում արտաբյուջետային ֆինանսավորման ձևավորման հարցերով.

պայմանագրային հիմունքներով վիճակագրության բնագավառում համատեղ գիտական հետազոտությունների և կիրառական մշակումների, փոխադարձ հետաքրքրություն ներկայացնող հիմնախնդիրների այլ միջոցառումների իրականացում.

վիճակագրական տեղեկատվության տարածում, անհրաժեշտության դեպքում, համատեղ ձեռնարկությունների ստեղծում.

վիճակագրական մարմինների գործունեության նոր ուղղությունների ուսումնասիրության և փորձի փոխանակման նպատակով մասնագետների փոխանակման իրականացում:

Կողմերը՝ սույն Համաձայնագրին և իրենց ազգային օրենսդրությանը համապատասխան, համագործակցություն կիրականացնեն վիճակագրության և իրենց գործունեության ոլորտներին վերաբերող այլ հարցերով:

ՀՈԴՎԱԾ 2

Տեղեկատվության փոխանակությունը սույն Համաձայնագրի շրջանակում կատարվելու է Կողմերի ազգային օրենսդրությամբ սահմանված կարգով:

ՀՈԴՎԱԾ 3

Տնտեսա-վիճակագրական տեղեկատվության փոխանակումը կիրականացվի Կողմերի ունեցած կապի միջոցներով, պայմանավորված ժամկետներում՝ ըստ համաձայնեցված սխեմաների, ձևերի և ցուցանիշների համակարգերի:

Տնտեսա-վիճակագրական տեղեկատվության միջգերատեսչական փոխանակման աշխատանքային լեզուն հանդիսանում է ռուսերենը:

ՀՈԴՎԱԾ 4

Կողմերը կօժանդակեն իրենց ենթակա կազմակերպությունների, հիմնարկությունների գործունեության ընդհանուր կամ կոնկրետ ոլորտներում ուղղակի պայմանագրերի կնքմանը:

ՀՈԴՎԱԾ 5

Կողմերը համատեղ կքննարկեն Համաձայնագրի մեկնաբանման և իրականացման ընթացքում առաջացած հիմնախնդիրները և կձեռնարկեն միջոցներ դրանք լուծելու ուղղությամբ, անհրաժեշտության դեպքում, պաշտոնական պատվիրակությունների մակարդակով կքննարկվի սույն Համաձայնագրի, կնքված պայմանագրերի իրականացման ընթացքը:

ՀՈԴՎԱԾ 6

Սույն Համաձայնագիրը կարող է փոփոխվել, լրացվել Կողմերի փոխադարձ համաձայնությամբ: Փոփոխությունները և լրացումները ձևակերպվում են առանձին Արձանագրություններով, որոնք հանդիսանում են սույն Համաձայնագրի անբաժանելի մասը և ուժի մեջ են մտնում սույն Համաձայնագրի 7-րդ հոդվածով սահմանված կարգով:

ՀՈԴՎԱԾ 7

Սույն Համաձայնագիրը կնքվում է անժամկետ և ուժի մեջ է մտնում Կողմերի կողմից անհրաժեշտ ներպետական ընթացակարգերի կատարման մասին միմյանց իրազեկ դարձնելու պահից:

Սույն Համաձայնագիրը կարող է չեղյալ հայտարարել Կողմերից մեկը, և այն իր գործողությունը դադարեցնում է մյուս Կողմից դրա վերաբերյալ հաղորդում ստանալու օրվանից վեց ամիսը լրանալուց հետո:

Կատարված է քաղաք 1999 թվականի , երկու օրինակից, հայերեն և ռուսերեն լեզուներով: Ընդ որում, երկու լեզուներով տեքստերը հավասարազոր են:

Հայաստանի Հանրապետության
վիճակագրության, պետական
ռեգիստրի և վերլուծության
նախարարության կողմից՝



Ռուսաստանի Դաշնության
վիճակագրության պետական
կոմիտեի կողմից՝

